## ٣ مونولوجات عامية

من مسرحية

الكيلو ١

تأليف

أحمد صالح

نمرة ١ : ( مُرتعشاً وناظراً إلى ماحولهُ وإلى الأفق ثم إلى الأرض ثم يتحدث ويزداد حديثهُ سرعة كلما استمر في الحديث وكأنه مُجبر ان يتحدث ..)

تعرف ..؟ انا كنت زمان بضحك م الخوف ، او كنت بخاف ، تعرف ..؟ انا كنت نُص حزين ، متكسر ، طب تعرف .. اني عامل زي اللي مش عامل اي حاجة بس عامل نفسه انه عامل حاجة ، انا فيلسوف جداً خلي بالك ، ايون ماهو طول مانا مغيب كدة يبقى مش راضي عن اللي بيحصل فهربان منهُ ، فانا فيلسوف ومش صايع حضرتك ، لا لا عُمر ايه اللي جري بيا ، انا بس اللي بزهق بسرعة فعايز اخلص بسرعة ، هو احنا مش في عصر السرعة ، يبقى ازاي عايزني ابعد عن السرعة ، تعرف ان انا لو مش كدة يبقى الناس هتعرف ، وهتبعد عنى وهيبطلوا يتكلموا عني ، ماهو انا هبقي انسان عادي ، فهما مبيحبوش يتكلموا عن العادي ، انما انا مش عادي وبحب الشاي بلبن ، والظاهر كدة ان المجتمع مبقاش يحب الشاي بلبن ، على فكرة بقا امي هي السبب ، لأنها عودتني اكون مبتسم وبحب الشاي بلبن وبشربوا اول مابصحي ، فلما هي بعدت وانا لامؤخذا يعني خليت الايام تجري بيا ، لقيت الدنيا مبتحبش الشاي بلبن ، تعرف انا بقا كمان مبحبش الشاي بلبن ، انا بحب اطير ، مانا بقولك انا فيلسوف ، ياخي اول مالزمن جري لقيتني بفشل ، تخيل ولا اقولك بلاش تتخيل انا بس اللي بعرف اتخيل انت تعرف بقا اني اكتشفت ان محدش بقا يضحك زيي ، زمان ياصاحبي لامؤخذا يعني كانوا يقولوا على اللي مبيضحكش فيلسوف انما دلوقتي بقا اللي بيضحك هو اللي فيلسوف ، مانا فيلسوف ماهو انا لو مش كدة الناس هتعرف ، ده انا حتى زمان كنت بسمع امى والعيلة بيقولوا نكت ، كان فيه واحد كدة اسمه مونولوفيست بيقول نكت ، والناس كانت بقا ايه لامؤخذا بتسمع نكت ، وانا لما خليت الايام تجري بيا ، جيت اسمع نكت اكتشفت انه مبقاش فيه نكت وانا بس الفيلسوف الوحيد اللي في العالم اللي بيحب النُكت ، ( فترة صمت )

تعرف ...؟ فيه ناس بتخاف م النكتة لتموت م الضحك !!

نمرة ٢: ( بثقة شديدة بالنفس ونرجسية تتحول فيما بعد إلى توتر وخوف شديد وضعف إنساني مميت )

بص انا انسان بقدر الشغل ، الشغل اللي فيه الناس بتشتغل ، لا لا مش هو مش هو ده مطرب زميل ، ايون ايون ماهي نفس البديهيات الالمعية ، مانا بقولك هو عبث مرتب ، ماهو حياتي دي مش مناسبة للجميع ، هي مناسبة للتاريخ اكتر ، ماهو ابويا قتل الكلب ، معرفش قتله ليه ، ايه ؟ ده فيلم زكي شان ، آآسف ، جدي قتل الحمامة اللي كنت عايز اطيرها ، قال ايه احنا ناس منربيش حمام احنا نربي طلق سلاح ، تار ، موت ، فاهم ياجعر ، ( صمت ) ايه ..؟ القصة منحوتة ، اتفووو عليك ، مانا عارف انها منحوتة ، ياعم ماحنا بقينا منحوتين اصلا ، انا منحووت ايوة ، ماهو انا لما جيت ابدع ، نحتوني ، طب بص انا هحكي قصة غيرها ، ( يحكي متأثراً ) زمان كنت ببص لنفسي في المراية واعيط وانا اراجوووز ، بلياتشو قال ، ( صمت ) ايه منحوتة بردوا ، طب بص انا هحكيلك قصة نرسيس ، ( صمت ) ايه عارفها .. ؟ ، بس متعرفنيش انا بقا ، انا بقا مش نرجسي ، ياعم انا عايز احقق ذاتي ، وعلى فكرة بقا مفيش حاجة منحوتة ، انت بس اللي شايف الناس زي بعضها ، ياعم انا مبحبش العب نيد فور سبيد ، انا بحب العب ماريو ، بهدوء كدة بشويش ، بس للاسف جيت ابدع ، خلوني العب نيد فور سبيد ، واجري اجري اجري اجري اجري ، لحد مابقيت انحت ، ياخي اتفوووه عليكم بقا ، انا زهقت منكم ، لا ياعم انا مش حمار ، انتوا بس اللي مبتقدروش العباقرة ، طيب ياعم تُشكر ، انك عارف ان انا لازما اكون عارف علشان اعرف ابقى عارف ، ياعم انا مليش في الابداع ياعم حاضر ومش عبقري ومش حاجة ، بس اديني فرصة ابقي حاجة طيب ، انت ليه مش عايز تديني فرصة ياعم اسمعني بس ، ماهو لو كل واحد مش هتصبروا عليه لحد مايكون واحد مش هيبقي واحد ، انتوا بس تخصص انكوا تعملوا واحد (يضحك) ، ياعم اقعد في بيتنا ليه طيب ، مانا نفسي اشتغل علشان منعزلش وانا بامانة مبحبش العزلة ، طب خلاص هروح اتفووو عليك ، روحت ولا لقيت جدي ولا لقيت ابويا ولا كلب ولا حمامة ولا سلحفة ولا بطة ولا تعلب براس تعبان ، قمت خدتها جري على السطوح ملقتش طيارتي الورق ، ياخي شوفت بقا علشان مخلتنيش وخلتني منحوت وقعت في طبق الدش واتكعبلت بس بص ، انا كدة مرتاح على الاقل انا فوق وانتوا تحت ، وانا هبصلك وابص للعالم واقول للعالم من فوق السطوووح ، اتفوووووه

( ثم يقع على الأرض ويركع .... )

نمرة ٣ : ( يُغني ) انتِ مش الأول ولا الاخر .. انا بس بتّاخر للزمن والوقت

( يتوقف عن الغناء .. يبكي ويضحك ثم يحكي ) بص هو كان حصان متجسد في شكل ملاك على هيئة تور من اللي كانوا في المعابد البابلية قدام ابو الهول ، علشان كيوبيد إله الحب غضبان عليا ، مرضاش يخليني فارس على حصانی ، ده حتی غضبان علیا فی حارتنا ، فیه بس فرق کبیر وخطیر ، رومانسی بس للاسف منسي ، المهم كان فيه بلكونة قدام البيت وفيه نبلة فالبلكونة حدفت شباك ع النبلة قزازها اتكسر ابوها عرف ، فالايام مرّت ، قمت انا واخد البلكونة وروحت اعتذر للنبلة وولي آمرها ، وطبعاً جبت خشب ملفوف بالكريمة ومتغطى زي مابيقولوا ملفوف لفة جاتووه بس قالب على تورتة ، المهم قولت ياعمي ، ياعمي ، ( يُغني ) ميردش ، ياعمي ميردش ، ( مُقلداً له )بص يابنى انت متنفعش خالص لانك معندكش خالص فمش هتنفعنا خالص ، شكراً يابني ، قولتله ياعمي ربنا يجحمك ياعمي ، اتبسط وانشكح ، قمت ماشي ، والبلكونة زعلانة ، الغريب ان النبلة كان عندها لامبالاة ، ياااااه ، قمت خارج وانا عالباب ، زعقت وقولت لأاااا انا لازم اقتله الراجل الشيوعي المادي البورجوازي الرأسمالي ده ، قمت مسكت المسدس وقتلت ..... ، قتلت ذكرياتي ، مر الزمن حوالي شهر الا ربع ساعة كدة ، قمت مسكت التليفون ، الو الو متخافيش متخافيش ، انا كويس جدا جدا جدا ، ومتماسك اوووي جدا ، لاقصى حد جدا ، ومبسووط جداً .. ( صمت ) ايه الرقم مش موجود بالخدمة ، طب مانا عارف هو مقفول وانا قلبي مفتوح .. هييييح ، ( يُغني ) تملي معاك تملي معاك ، ( يزداد الإيقاع ) وهي عاملة ايه دلوقت وهي عاملة ايه دلوقت ، ( يتوقف عن الغناء ) متخافيش انا شوفتك عروووسة ، عرووسة مببسووطة ، والصراحة يعني بحسدك انك عروسة حرة وطليقة وكل الاراجوزات اللي في العالم تتمناكي ، انما انا ... ، انا ماريونت ياحبيبتي ، مر الزمن حوالي ممرش كدة ولقيتها ماشية في الشارع هي وحصوتها الصغيرة ، متخافييش انا اللي خايف ، انا بقا مش عارف ليه كل شوية افتكر لما كانت بتقولي ، ( مُقلداً لها ) انت بائس اووي ، لا ياحبيبتي انا فاهم والفاهم بيتعب ، هي سافرت ورجعت والحصاوي ملت البيت ، انما البلكونة بتشتري الكفن دلوقتي ، ايه ... ؟ خايفة !

متخافيش متخافيش هكلم ربنا عنك

( ثم ينام على المسرح واضعاً يديه تحت رأسه ، وينظر إلى الأفق ، كأنه يتخيل حبيبته وهي تعود من جديد ... إنه الان يتخيل الحلم ! )